



NOS:

PRINS: ARUBIANO

Cacique mayor di Ayo,
Cashero y Matividiri;
Alto Magistrado di Tamarijn,
Cristal, Blumond y Sero Pita.

PANCHO: ORIGINAL

Gayo Lindo di Papilon,
Macuarima y Angochi;
Galan Superior di Rooi Bosal,
Santa Marta y Sero Biento.

Dirigentenan cu tur simpleza y humilde di e baranca Carnavalista Aruba.

CONSIDERANDO:

Cu pa poblacion y bishitantenan di e isla aki goza di un bon carnaval cu tur su luho, belleza, y fantasia; y pa mantene Carnaval Original Arubiano cu su fama y distincion di un di e carnavales mas preciosos na mundo; ta ratifica aki medidanan di austeridad pa Carnaval 43.

1....Entrante awe, Prins Arubiano y Pancho Original kendenan a wordo eligi mas corecto y justo posible den eleccion di mas democratico mundial di Prins y Pancho, ta eligi Club Estrella como Mansion Real di Carnaval 43.

2....Pa mantene nos economia riba e nivel actual, y mehora esaki den futuro, nos parlamentarianan lo cobra mescos cu prome cu 1986..... esta NADA... y haya fin di luna como recompensa, 30 pida "pan bati" pa hiba cas.

3.... Pa percura pa trece nos isla back na su periodo di Aruba Original, lo elimina tur salario di trahadornan y ganashi di empresarianan, y compensa tur hende fin di luna cu macuto di comestible di necesidad. Lo no por papia mas di pover ta bira mas pover y rico ta bira mas rico.

4.... Pa evita problemanan den mando policial, ta elimina cuerpo policial y lo duna nos "schutternan" cu nunca a haya reconocimiento, oportunidad pa mantene orden y tranquilidad riba nos isla.

5....Como cu e gobiernantenan prome cu nos a dicidi di baha prijs di awa cu toch lo keda como un peso riba cada carter, lo elimina WEB y construi un fabrica di "Cadushi Water" cu ta mas salubable y barata cu "awa di lama contaminada".

6....Ya cu coriente ta birando mas caro y mester economiza, lo construi un industria di flambeuw, pa cada cas por tin suficiente luz. Pa frigidaire y Airco por sigui usa bateria penlight cu ta mas barata.

7....Como cu deporte ta importante pa tur pais y mester prepara pa weganen Panamericano, lo sigui entrena nos parlamentarianan den centro deportivo nobo na Colegio Arubano, den disciplina di boxeo, lucha libre y di tirador di schotter, pa representa nos isla dignamente.

8....Pa evita e problema di mucho trafico y di poco lugar di estaciona auto, y combati e polucion di gas di mufflernan, lo contrui riba nos isla un fabrica di hala, pa cada habitante por bula bay unda cu e kier, den menos tempo y cu ta sali mas barata.

9.... Pa pone un fin na problemanan tradicional di ASOMA y SAC, lo introduci na lugar di concurso di calypso - roadmarch y tumba, un

concurso di "Voz di baby di carnaval" organiza pa kraamafdeling di Hospital.

10....Di awe en adelante lo no tin castigo mas pa casonan di droga. Cu financiamiento di Merca, tur usador di droga, y traficantenan lo ser entrena como astronauta y haya un pasashi di ida pa espacio pa yuda construi e laboratorio espacial Alpha.

11....Pa baha gasto di construcion di cas, y elimina e problema di vivienda; nos lo subsidia "trahamento di cas di lodo of torto" cu dak di taki di coco of yerba; na rand di barancanan parti noord, oost y west di nos isla. E habitantenan na mes momento lo fungi como "Kustwacht".

12.... Pa desarolla nos turismo y na mes momento elimina problema di ilegalnan, Aruba lo bini cu e proyectico cu lo bira "di ocho milager di mundo". Cada ilegal lo haya trabao legal pa yuda construi "un trapi di Jamanota te na porta di cielo".

Como cu tradicionalmente nos mandatarionan ta ser recompensa na traspaso di mando, a dicidi e aña aki lo siguiente:

A..... Nos Gobernador ta haya encargo pa durante periodo di carnaval conta e cantidad pipita di stof cu ta cay riba casnan na Santa Martha.

B.....Nos president actual di Staten cu ta hopi activo lo haya un trabao mas activo ainda pa durante paradanan di carnaval protega nos salud.

E lo tin encargo pa cana durante paradanan di carnaval, cu saco di plastic y colecta tur huma di sigaria di carnavalistanan.

C..... Nos prome ministro cu tambe merece un periodo di descanso, lo ricibi pasashi pa celebra carnaval di Siberia y viaja den bodega di avion lora den un saco, marca como Cargo Zak.

D.....E demas miembronan di Consejo di Ministro lo ricibi e tarea pa durante periodo di carnaval, equipa cu skeiro di diente, kita tur frustro di Ferry Almirante Luis Brion na Barcadera, pa esaki por ta blink pa wordo bendi como hero bieuw.

CONCLUSION:

Pa Aruba su carnaval sigui carga e nomber di e Carnaval cu mas seguridad na mundo pa carnavalistanan, y pa sigui cu nos lucha contra droga, manteniendo respet y decencia y bon moral, ta pidi cada habitante pa cuida nos isla, nos turismo, nos idioma y dignidad na halto celebrando un carnaval 43 civico.

Pancho Original ta keda encarga cu checucion di e decreto aki y manda copia pa Nacionnan Uni, Organizacion di Estadonan Americano, Organizacion di Estadonan Africano, Union Europeo via Internet manera el a ser formula y presenta.

Duna y firma
na Palacio Club Estrella
y seya na Castillo Complejo Deportivo Betico Croes,
e di 26 dia di e prome luna di aña di carnaval 43, 1997.

PRINS ARUBIANO
Carlos Geerman

PANCHO ORIGINAL
Richard Bislip

C. Geerman

Richard Bislip